

BIAK IN CHHUNGA INCHEI DAN TUR LEH AWM DAN MAWI KAIHHRUAINA SYNOD-IN A SIAM THAR

Aizawl Central Presbytery-in “*Biak In chhûnga inchei dan tur kaihhruaina Synod-in siam rawh se*” a tih leh Aizawl Hmar Presbytery-in “*Pathian Biak Inkhawma awm dan mâwi inzirtir rawtna*” Synod-a an thlen chu Synod Inkhawmpui chuan ða tiin, ‘Synod Executive Committee-in hman nghal turin kaihhruaina fel tak lo siam rawh se,’ tiin a dah a. Synod Executive Committee chuan hetiang hian kaihhruaina chu a siam ta a ni (2010 Synod Gen. 39; SEC 233:15; 234:12; 235:20 App. 4).

I. Biak In chhunga incheina

A. Mipa tan

1. Pathian biak inkhawmah mahni phak tawka incheina kan neih ðhatte fel fai taka inbelin inkhawm ðhin ni se.
2. Rawngbawltute, Pulpit, Maicham leh Lectern vela hun hmangtu tur chuan a theih hram chuan Kohhran mipui pawhin Kohhran inkhawm zahawmna kawnga âwm an tihpui theih tur thawmhnaw inbel leh pheikhawk bun te hi a mawi a, kohhran mipuiten inthlahdah anga an ngaih theih tur leh âwm lo an tih anga thawmhnaw inbel loh hrâm a ðha.

B. Hmeichhe tan

1. Pathian biak inkhawmah thawmhnaw thianghlim leh zahawm pângngai tak inbel hi a ðhain a mawi a. Kekawr hâk te, kawr pan lutuk taksa lang tlang hâk te, kawr âwm zâu lutuk leh hnung lam inhawng zâu lutuk hâk te, kawr bân bul lutuk leh tâwt lutuk hâk te hi a mawi lo va, hâk loh a ðha.
2. Pathian biak inkhawmah puan bih emaw, pawnfên pangngai fên emaw hi a ðhain a mâwi a, hei hi zawm tlân ni se.
3. Hmai hnawih (*make-up*) hman hian hmêl a timawi a, a mawi tawh hman thiam erawh a ðha.
4. Inneih nia Mo incheinaah hian a mawi leh zahâwm tawh ngaihtuaha inthuan ni se.

II. Biak In chhunga awm dan mawi

Kohhranhote Pathian biao Biak ina kan inkhawm hian Biak in chhung awm dan tur kan infuih thar reng a ngai a, chutiang atan chuan a hnuai mi hi zawm tlan tum ni se :

1. Inkhawmna-ah Bible leh Hla bu ken ðhin tur a ni a, thu zir tur bik awm ðumah chuan zir laibu ken ðhin hi a mâwi.
2. Biak in-a luhin ðhut fel veleh ðawngtâi tur a ni. Inkhawm chhung chuan chhuah loh hram ni se, loh theihloha chhuah a ðul pawhin ðha taka luh leh ni se, ðul bik thil a nih loh chuan inkhawm bân hmâin haw loh hram ni se.
3. Biak in chhung hi kan zah tur a ni a, bula mite nena inbiak te, thil ei te, ðhial leh hmuam lam chite tih loh tur a ni a, mit rîn leh inhnawih lam chi te pawh tih loh tur a ni.
4. Biak in-a luh dâwnin Mobile phone hmeh hlum (*switch off*) emaw, ri chhuak lo (*silent*) emawa dah ðhin tur a ni a, Biak in chhungah hman loh tur a ni.

PASTORAL MINISTRY THUPUI - 2012

Synod Pastoral Committee chuan, kum 2012 Pastoral Ministry Thupui atan “**RAM CHU LALPA TAA NI**” (Sam 22:28) tih a thlang. Pastoral Ministry Thupui hi Minister/Pastor leh Kohhran Upaten Sermon-ahte thiam ang anga bawhzui ðhin a ni



Editorial Staff

Rev. K. Lalpiangthara

Rev. B. Lalngkhakliana

Upa H. Ronghaka

Upa C.H. Thangkhuma

BUKNA DIK

Kum zabi 8-na lai vela Pathianin Israel-hote a dem fona chu bûkna dik an hman loh vang a ni a. An hlawkna tura bûkna dik lo an hman leh tehna hrang hrang an hman òin bakah rorel

danahte pawh bûkna dik an khai lo va, mi rethei leh hausate kar a hla hle a, zawlneiho hmangin na takin an thiltih dik loh a hriattir òin. Sawi tur tam tak awm mah se hengte chauh hi kan in en nan han tar lang ila -

1. Lei leh zawrh thilah : Dawrkaiin a thil zawrh dik taka a bûk chuan hmuh a nuam òin a, lei leh pawh a chakawm sawt òin. Òenkhatin a bûklung an tizàng a, òenkhatin patla lam bûk hleiin an siam a, òenkhatin bûk lung chi hrang hrang an hmang bawh òin. Bûkna dik lo hi Lalpa mit hmuhin thil tenawm a ni tih hi i hre thar leh ang u (Thuf.11:1).

2. Khawtlang leh ram rorelnaah : Chhungkhat leh party mi induhsak bikna avanga bûkna dik lo hman a, hna lak tur thila a thiam zawk thiam lo zawka dah te, a phu zawk aia phu lo zawk duhsak ang chi te leh thubuai remna thilah pawh a thiam zawk aia thiam lo zawk thiam chantir chin te hi Pathian ngaiha bawhlhlahw leh tenawm a ni.

3. Kohhran rorelnaah : Rawngbawltu ruat thuah te, zir tur leh thawktu tur lak thuah te, hmelhriat loh te aia hmelhriat sa duhsak te leh lam hla deuh te aia mahni chhung khat leh laina hnai te duhsak zawkna rilrute pawh hi put palh ve theih tho a ni a. 'Lal Isua ni se engtin nge a tih ang' tih hi teh nan kan hmang fo tur a ni. Kristian nun kaihhruaina 6-na Kristian nun - Khawtlang lam (3)-na pawhin, 'Rorelna te, tehna te, bûkna te dik taka tih vek tur a ni,' tiin min zirtir a ni (Lev.19:35; Thuf.20:10).

WILL GRAHAM CRUSADE

Billy Graham Evangelistic Association (BGEA) leh Mizoram Synod òang kawpin February 16-19, 2012 chhunga Joint Y.M.A. Field, Vaivakawn-a Crusade an buatsaih mekah February 16 (Ningani) zanah Pandal hlan leh Programme hawwna, Synod Moderator Rev. Thangzauvan a hman zawhah India rama BGEA hotu Rev. Dr. Robert Cunville-a'n thuchah a sawi.

February 17-19 chhungin ni tin inkhawm wavi hnih - chawhnu lam leh zanah a awm a, Kohhran Hmeichhe pual inkhawmah Rev. Cunville-a hian thu sawi lehin inkhawm dang zawngah chuan Billy Grahama tupa William Franklin Graham-a'n Pathian thuchah a sawi òin a; mipuiin an hlut hle. Central Y.M.A Pandal structure hman a ni a, pandal khuh chin bak zau tawh tak hung telin mi 12,000 vel òhut theihnaa siam a ni.

MIZO KRISTIAN HLA CHUNGCHANG ZIRHONA

Aizawl Theological College-a Calvin Study Centre bultumin January 28, 2012 (Inrinni) nileng khan Zarkawt Presbyterian Kohhran Hall-ah Mizo Kristian Hla Chungchang Zirhona (*Seminar on Mizo Christian Songs*) buatsaih a ni a, Aizawl khawpui chhunga Kohhran aiawhte leh mi sawm bik eng emaw zat an kal.

Seminar-ah hian thupui pawimawh tak tak pathum hetiangin zir ho a ni:

1. Calvinism leh Mizo Kristian Hlate, Rev. Dr. Tlanghmingthanga ziaik;
2. Mizo Lengkhawm Hla Zirchianna, Upa Prof. R.L. Thanmawia ziaik;
3. Mizo Kristian Hla Chi Hrang Hrangte Bihchianna, Rev. Prof. Vanlalchhuanawma ziaik.

V.C/L.C INTHLANATHAWHHONATHUTHLUNG

February 3, 2012 khan Mizorama Political Party hrang hrang hotute leh Mizoram People Forum (MPF) Headquarters hruiute inhmuh khawm chuan February 23, 2012-a Village/Local Council Inthlana òan lak ho dan tur an sawi ho va. He inthlan hi thianghlim leh felfai taka neih ngei ni sela, vote nei thei dik takten vote thlak ni sela, tharum hmanga mi vau, tihtaih leh sawrkar hnathawk vau beh te tih loh ni se, tiin an duh dan an puang chhuak a. Inthlan zawh fel thleng huam tur 'Thawhhona Thuthlung' an siam bawh. Thawhhona Thuthlung hi ni tin chanchinbu hrang hrangah a kimchangin chhuah a ni. **"Thawhhona Thuthlung piah lamah MPF Local Forum-in ruahmanna hran siam loh tur a ni"** tih a ni bawh.

Thawhhona Thuthlungah hian Mizorama Political Party hrang hrang - MPCC, MNF, MPC, ZNP leh BJP aiawhten hming an ziaik a, MPF lam aòangin Rev. Lalzuithanga, Sr. Vice President, Upa Lalramthanga, General Secretary leh Dr. Lalbiakmawia Ngente, Secretary-ten hming an ziaik ve bawh a ni. Thuthlung bawhzuiin M.P.F Local Forum-ten hma an la mek zel.

SAWMNA

Samlukhai Kohhran chuan March 17, 2012 khian Biak In thar an hawng dawn a, He Kohhrana lo lawi tawh zawng zawng leh Bialtu Pastor leh Pro. Pastor lo ni tawh zawng zawng te hmanpui turin an sawm.

Phuaibuang Pastor Bial chuan Bial Inkhawmpui wavi 50-na Golden Jubilee chu Phuaibuang Kohhrana lawm turin a rel a; he hun leh hmuna lo tel turin Phuaibuang Pastor leh Pro. Pastor lo ni tawh zawng zawngte leh Kohhran Upa leh rawngbawltu, Kohhran mi hmun danga awm tawh zawng zawngte tel vek turin an sawm.



Tûk khat chu Râl Vêngtu thu leh hla ngaithla thintute an lo thlen har deuh avang chuan Râl Vêngtu khua a lo har hman hle a. A râlvên bûk atang chuan a tarmit sawi tha sauh sauh chungin a lo thlir a. An va thlen chuan an tlai chhante a lo zawt a. Anniho chuan an zing tawngtai inkhawm an rei deuh avanga an tlai thuin an chhang a.

Râl Vêngtu chuan, “Eng thupui hmangin nge in tawngtai a?” tiin a zawt a. Mite chuan, “Zalen taka kan awm reng theih nan te, chhiatna leh harsatna chi hrang hrang laka kan him theih nan te, hriselna tha tak kan neih theih nan te, damlo leh mitthi kan awm loh nan te, finna leh thiamna kan neih sân deuh deuh theih nan te,” tiin an chhang a.

Râl Vêngtu chuan nui hak hak chung hian, “In zalen lutuk hi inzalen loh phah a, harsatna in nei lo lutuk hi harsatna in tawh tam phah a, in hrisel lutukna lamah in hrisel lo zawk a, in dam lutuk hi in nat tam phahin in thih tam phah a, in fing leh in thiam lutuk hi Pathian mithmuhah pawh in mawl phah zawk a ni lo maw?”

“Fâr chi khat chanchin hi ka’n hrilh teh ang che u. Pil pan tak a ni a, lei tha a lo tiah chuan a tshang uak uak a, rei loteah a thi a, a mawih ral thuai thin a. Lei chhe tak emaw, lung keh karah te emaw a lo tiah chuan dam chhuah tumin nasa takin tan a la a; a chung lamah chuan bit deuhin kua a siam thlur sung mai a, chu chu tuihnangin a hnawhkhat leh vek a, kum tam tak tak a dam thei a. Thliin a chhem nasat poh leh a nghet ting a ni mai. Naktuk zing tawngtai inkhawmah in vaiin kal leh ula. Zalenna aiah nekchêpna, nawmsakna aiah harsatna, damna aiah tawrhna, fin leh thiamna aiah Pathian ngaiha âtna in rawn dil tawh zawk dawn nia,” tiin a chah a. A thusawi ngaithlatute chuan, “A ni zawk âwm mang tak e, naktuk zingah chuan min hrilh ang hian thupui kan lo thawh tawh dawn nia,” an ti a, an veng lam panin an haw leh ta dam dam a.

BIAK INA BIBLE HMAN TUR

Mizoram Synod Secretary Upa D.P. Biakkhuma chuan Synod Executive Committee thurel (SEC 235:43), **“Kan Kohhran Pathian Biak In khawmah Bible Society of India kutchhuak Bible hman thin tur a ni,”** tih chu Kohhran tinah hriattirin Kohhran inkhawmah a tam thei anga puanzar tura tih a ni.

SYNOD HOSPITAL, DURTLANG JANUARY, 2012 CHHUNGA THILPEK DAWNTE

I. CHARITY FUND

1. Pu Hualhnuna, Sihphir Venghlun	Rs. 1,000
2. Presbyterian Kohhran, East Lungdar Venghlun	Rs. 2,800
3. Sawleng Kohhran Hmeichhia	Rs. 5,000
4. Presbyterian Kohhran, Ngopa Chhim Veng	Rs. 3,000
5. Presbyterian Kohhran, Samlukhai	Rs. 5,000
6. Presbyterian Kohhran, Ngopa	Rs. 10,000
7. Dr. K. Lalremmawia, Hospital Campus	Rs. 2,000
8. Presbyterian Kohhran Hmeichhia, Buhban	Rs. 1,000
9. Presbyterian Kohhran, Champhai Kahrawt	Rs. 3,000
10. Zirduha, Ramhlun Venglai, Aizawl	Rs. 2,000
11. Upa Lalbiakchhunga-te chung, Republic Venglai	Rs. 4,000
12. Sangau Pastor Bial Kohhran Hmeichhia	Rs. 3,000

TOTAL

Rs. 41,800

II. THISEN PETE

1. KTP, Hualtu Branch	33	Units
2. KTP, Venglai Pastor Bial	51	Units
3. KTP, Bethlehem Venglai Branch	29	Units
4. Aizawl Theological College (ATC)	45	Units
5. KTP, Salem Veng Branch	43	Units

TOTAL

201 Units

III. THIL DANG PETE

1. Presbyterian Kohhran Mission Vengthlang - Water Cooler 1
2. Kohhran Hmeichhia, Khatla North - Refrigerator (LG) 1.
3. Pi Zovi, Chaltlang, Aizawl - Grace Home tan Rs. 17,770/-

Khawngaihna leh duhsakna avanga kan Lalpa Isua Krista hminga thilpek min petu zawng zawngte hnenah Isua Krista hmingin lawmthu kan sawi tak meuh meuh a ni e.

Sd/-
(REV. C. LALBIAKHLUNA)
Chaplain,
Synod Hospital.

KANDHAMAL (ORISSA)-A SMB HMALAKNA

Synod Mission Board (SMB) chuan Kristiante tihduhdah leh nekchepna nasa tak a thlenna hmun Orissa state-a Kandhamal District chung Udaigiri-ah Doctor pathum Dr. K.C. Lalchhingzova, Dr. Ramdinmawii leh Dr. Lalsangpuui te leh nurse pakhat leh thawktu dang pakhat ruaiin hma a la zel. Hengah hian Moorshead Memorial Christian Hospital Trust, Orissa nen thawhhona kalpui a ni. Orissa rama thawh zel dan tur chungchang a hmuna zir chiang turin February thla tir khan Synod Mission Board Secretary Rev. Lalchhuanmawia te, Rev. Z.D. Lalhmachhuana leh Upa B. Lalrinliana (BEC Members) te an kal a; Kohhran awm sa tihchak lama theihtawp chhuaha hma lak zel tum a ni.



Lêng Kohhran chuan Dt. 17.10.11 - 4.11.2011 chhung khan Dintharlehna Team Speaker, Pu Malsawmthara ruaiin Chhandamna Camping chhawng li an buatsaih a; Camper 225 lutin Pathian Thlarau Thianghlim tihharhtharna an chang nasa hle. Mi tam takin hluihlawn thil an hal ral a. Upa Lalramliana leh Pu A. Lalrinliana ten vawk an thawh a; Kohhranhoten tisa leh thlarau lam ruai hlim takin an kil ho.

Thingsát Kohhran chuan Dt. 3.11.2011 - 24.1.2012 chhung khan Joshua Operation Team Speaker C. Lalnunsanga ruaiin Camping chhawng li an buatsaih a; Pathian Thlarau Thianghlim tihharhna ropui tak an chang a, zu zuarten an zu zawrh simin, pawl chhuahsante an lo kir leh bawk a, Kohhranho an hlim hle.

Tlungvel Gate veng Kohhran chuan Nov. 16 - Dec. 18, 2011 chhung khan Nehemia Gospel Team Speaker, Tv. Johny R. Lalmangaiha ruaiin Camping chhawng thum leh Naupang lâng Camp an buatsaih a. Campers 210 zingah Kohhran pawl dang mi eng emaw zat an tel. Rawngbawltu inthlahdah leh ringtu hnungtawlh tawh tam takin harhtharna an chang leh a, Kohhranhoten an hlawkpui hle.

Meidum Kohhran chuan Dt. 3 - 18.12.11 chhung khan Eliasiba Gospel Team speaker K. Lalthuama ruaiin Chhandamna camping chhawng hnih leh Naupang lang camp vawi hnih an nei a. Kohhran ngui leh chau takah Thlaiten harhtharna changin Pathian ropuina a lo lang a, Kohhran boruak a nuam hle.

Rawpuichhip Kohhran chuan Dt. 3 - 18.12.2011 chhung khan Mi lungngaiete Thian Team Speaker, Pu K. Lalingaihawma ruaiin Camping chhawng thum an buatsaih a. Camp-ah hian mi 370 an lut a, mi eng emaw zatin Thlarau Thianghlim siam thar lehna changin, Zu zuarten an zu zawrh bansan an tum thu Kohhranah puangin, taksa leh thlarau damna chang thar thahnem tak an awm. Kohhranah Thlarau Thianghlim hnathawh a thleng nasain Kohhranhoten an hlimpui hle.

Sesih Kohhran chuan Dt. 3 - 18.12.11 chhung khan Agape Gospel Team Speaker Upa Lallawmsanga ruaiin crusade leh camping an buatsaih a; Inkhawm ngai lote an inkhawm ta a, khawtlang nun a nawm phah a, Krismas pawh nuam takin an hman phah niin an hria.

Sialsir Kohhran chuan Dt. 3 - 15.12.2011 chhung khan Chanchin Tha Puangtu Team Speaker, Tv. Laltnamawia ruaiin Camp chhawng hnih leh Crusade an nei a. Campers 162 lutin harhtharna lawmawm tak Kohhranin an chang thar.

Saiphai Kohhran chuan Dt. 12 - 21.12.2011 chhung khan Pu V. Thanguama (Gospel Herald Team) Speaker-a hmangin camping chhawng hnih leh Naupang lâng camp an buatsaih a; campers 119 an lut. Kohhran pawl dang EFCL, UPC leh Kohhran Thianghlim atangtein an lo lut a; Pathian hnathawh avangin Kohhranhoten an hlawkpui hle.

Kolasib Tuihta veng Kohhran chuan Dt. 13 - 18.12.2011 chhung khan Pu C. Sapchhawna (Remna Palai Team) Speaker-a hmangin Crusade an buatsaih a, Kohhran leh khawtlangah rah duhawm tak a chhuah. Kohhran pawl dang mi, Presbyterian Kohhrana inpe pawh an awm a, Thlarau lamah an hlawkpui hle tih thu kan dawng.

NGENNA

Mizoram Presbyterian Church Synod hnuaiia kan Chanchinbu chhuahhote - Kristian Tlangau, Synod News Letter, Didakhe, Ramthar, Kristian Thalai, Agape, Kristian Naupang, etc. latuten - Agent inthlak thu-ah te, a lak zat thu-ah te, a lak man thu-ah te leh thil dang dangah phone hmanga Office lam dawr duh chang kan nei thin a.

Ziaka thil chhinchhiah ngaite a nih deuh ber thin avangin min rawn dawr duhte chuan Office kal niah Office hun chhung (Dar 10:00 a.m. - 04:00 p.m.)-ah min rawn dawr theih hram chuan a lawmawm khawp ang. Office hun chhunga remchan lohna a awm a nih pawhin a hnuaiia Mobile number-ahte hian SMS-a rawn dawr mai thin turin kan inngan a ni e:

1. **Kristian Tlangau, Kristian Naupang leh Synod Newsletter** - Business Manager 9862365908.
2. **Agape** (Kohhran Hmeichhia) - Editor 9862068537
3. **Kristian Thalai** (K.T.P) - Editor 9436142398
4. **Didakhe** (A.T.C) - Manager 9436376459

Sd/-Editor,
SL & PB.

SERAMPORE DEGREE HLAN INKHAWM

February 8- 11, 2012 chhung khan New Theological College, Deradhun-ah Senate of Serampore College (University)-in Senate hnuaiia College hrang hranga zirlai, an zirlai tha taka pass-te hnenah degree hlan inkhawm (Convocation) a buatsaih a. Aizawl Theological College atangin Principal Rev. Dr. Vanlalchhuanawma te, Registrar Rev. Dr. Vanlalnghaka Ralte te Pi T. Vanlaltlani (ATTUI aiawh) te leh zirlai thenkhat an kal.

Doctor of Divinity (D.D) degree hlan thar pathum zingah PCI hnuaiia Cachar Hill Tribe Synod-a mi Rev. Hrilrokhum Thiek a tel. Mi 12 hnenah Doctor of Theology (D.Th.) hlan an ni a, an zingah Aizawl Theological College lecturer Rev. H. Lalrinthanga a tel bawk. Heng bakah hian D.Min. paruk, M.Th. 131, B.D. 689, BCS 71 leh B.Th. 328 hnenah degree hlan a ni. Aizawl Theological College atanga zir chhuak mi 14-in M.Th. degree an dawng thar a, zirna kalphung tihdanglam vangin ATC-ah chuan B.D final year pangngai neih loh kum a ni a, mi paruk chauhvinn B.D degree an dawng.

Convocation Inkhawm bakah February 8&9 khan India rama Pathian thu zirna lam ngaihtuahu (BTESSC) Meeting leh Senate Meeting a awm a; Convocation thlengt New Theological College Silver Jubilee ropui taka lawm a ni bawk.

Rev. Dr. H. Vanlalauvan Dean, Research and SETRI a nihnaa a Report hmasa ber a pe a; Zirtirtu thi, sun pali zingah Rev. Dr. R. Chhuanliana a tel bawk.